



ILIDŽA

INFORMATIVNI BILTEN OPĆINE ILIDŽA

BROJ 155 • ILIDŽA • DECEMBAR 2016.



Utvrđen Nacrt Budžeta u iznosu od 24.000.000 KM

Općinsko vijeće Ilidža 8. decembra 2016. godine na prvoj redovnoj sjednici u Multifunkcionalnoj sali utvrdilo je Nacrt budžeta za 2017. godinu u iznosu 24 miliona KM. Prema Nacrtu prihodi od poreza iznose 12.656.594 KM, neporezni prihodi 9.812.406 KM, tekući transferi 1.530.000 KM, te prihodi od zaostalih obaveza 1.000 KM. Tekući rashodi iznose 23.310.000 KM, a kapitalni izdaci 690.000 KM. Za ovaj nacrt glasalo je ZA 21 vijećnik, osam suzdržanih te dva nisu glasala.

Utvrđeni Nacrt budžeta upućen je na javnu raspravu koja se putem MZ-a prema utvrđenom rasporedu organizuje i provedi. Nacrt je objavljen na web stranici, kao i na oglasnim pločama po mjesnim zajednicama, kako bi se građani informisali o terminima održavanja javnih rasprava i učestvovali u njima. Zadužuje se Općinski načelnik da za narednu sjednicu podnese vijeću izvještaj o rezultatima javne rasprave i Prijedlog budžeta za 2017. godinu.

Vijećnici novog saziva Općinskog vijeća usvojili su i Prijedlog izvještaja o izvršenju budžeta Općine Ilidža za period 1. januar – 30. septembar 2016. godine.

Donesena odluka o stipendiranju talentovanih učenika i studenata

Općinsko vijeće Ilidža na prvoj redovnoj sjednici na prijedlog Općinskog načelnika donijelo je Odluku o stipendiranju talentovanih učenika i studenata u školskoj/akademskoj 2016/2017. godini. Ovom odlukom Općinsko vijeće Ilidža dodjeljuje stipendije talentovanim učenicima srednjih škola Kantona Sarajevo i redovnim studentima visokoškolskih ustanova Univerziteta u Sarajevu u školskoj/akademskoj 2016/2017. godini. Na raspisani Konkurs za stipendiranje talentovanih učenika u srednjem i studenata u visokoškolskom obrazovanju u školskoj/akademskoj 2016/2017. godini prijavilo se 365 kandidata (143 učenika srednjih škola i 222 studenta visokoškolskih ustanova), od kojih 320 ispunjava uslove Konkursa (120 učenika i 200 studenata).

Iz Budžeta za ove namjene izdvojeno je 295.140,00 KM (93.600,00 KM za učenike i 201.540,00 KM za studente).



Usvojen izvještaj JP “Ilidža”

Kao tačka dnevnog reda bio je i Izvještaj JP “Ilidža” d.o.o o namjenskom utrošku sredstava subvencije javnim preduzećima u iznosu od 100.000 KM, te prijedlog odluke o visini novčane naknade za neprofesionalno obavljanje funkcije zamjenika predsjedavajućeg Općinskog vijeća Ilidža.

Vijeće je podržalo ovaj materijal.

Sjednice Vijeća zadnji četvrtak u mjesecu

Redovne sjednice Općinskog vijeća Ilidža u mandatnom periodu 2016 – 2020. godine održavat će se zadnji četvrtak u mjesecu uz izuzetak da se termin održavanja sjednice izmijeni u izuzetnim slučajevima kao što su državni praznik, vjerski praznik i druge slične okolnosti.

Budžet Općine Ilidža 24 miliona KM

Općinsko vijeće Ilidža na drugoj redovnoj sjednici, održanoj 28. decembra 2016. godine usvojilo je budžet Općine Ilidža za 2017. godinu u iznosu od 24.000.000 KM. Najviše sredstava planirano je za kapitalne projekte 6.260.000 KM, za udruženja građana 500.000 KM, za kulturu 405.000 KM, za sport 300.000 KM, za obrazovanje, nauku i mlade 439.000 KM, za zdravstvo 100.000 KM, za socijalne pomoći pojedincima 300.000 KM i za vjerske objekte 200.000 KM. Vijeće je donijelo i Odluku o izvršenju budžeta Općine Ilidža za 2017. godinu kojom se uređuje struktura prihoda i primitaka, rashoda i izdataka budžeta, njegovo izvršavanje, prioriteta plaćanja i finansijsko izvještavanje.



Stipendije za djecu slabijeg imovnog stanja, djecu bez oba roditelja i djecu bez roditeljskog staranja

Općinsko vijeće je donijelo Odluku o stipendiranju učenika i studenata slabijeg imovnog stanja u školskoj/akademskoj 2016/2017. godini u ukupnom iznosu od 89.500 KM. Odlukom će se stipendirati ukupno 112 učenika i studenata, od toga 69 učenika i 43 studenta. Mjesečni iznos stipendije za učenike je 75 KM, a za studente 100 KM. Stipendije će dobijati 10 mjeseci.

Vijeće je na sjednici donijelo i Odluku o stipendiranju djece bez oba roditelja i djece bez roditeljskog staranja u školskoj/akademskoj 2016/2017. godini u ukupnom iznosu od 38.700 KM. Stipendirat će se 39 djece, od toga 12 studenata, 11 učenika srednjih i 16 učenika osnovnih škola. Učenicima srednjih i osnovnih škola mjesečni iznos stipendije je 75 KM, a studentima 100 KM.

Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Macić Sejde, Čavčić Alije, Kapetanović Mirsada, Hozić Mustafe, Delić Kemala, Vatrić Nijaza, Havić Adema, Karaman Hajrudina, Durmo Bajre i Bilić Dalibora. Usvojeni su i prijedlozi rješenja o rješavanju imovinsko-pravnih odnosa u svrhu legalizacije poslovnih objekata po zahtjevima Beganović Samira i Čustović Marije, te rješenja o rješavanju imovinsko-pravnih odnosa u svrhu legalizacije stambeno-poslovnih objekata po zahtjevima Alilović Muzafera, Jusufović Mustafe i Šulović Smajila. Usvojen je i prijedlog rješenja o rješavanju imovinsko-pravnih odnosa u svrhu legalizacije pomoćnog objekta po zahtjevu Ibragić Ahme i prijedlog rješenja o poništenju rješenja Općinskog vijeća br. 01-31-156/2-12 kojim je utvrđeno pravo vlasništva u korist Musić Mustafe.



Odluka o utvrđivanju javnog interesa “Izgradnja aerodromske infrastrukture – proširenje platforme za parkiranje aviona”

Općinsko vijeće Ilidža na redovnoj sjednici održanoj 28. decembra 2016. godine donijelo je Odluku o utvrđivanju javnog interesa “Izgradnje aerodromske infrastrukture – proširenje platforme za parkiranje aviona”. Odlukom je određeno da je JP Međunarodni aerodrom “Sarajevo” korisnik eksproprijacije.

JP Međunarodni aerodrom 9. augusta 2016. godine obratilo se Općini da se utvrdi javni interes za eksproprijaciju nekretnina, koje predstavlja građevinsko zemljište, u neposrednom kontaktu sa kompleksom Međunarodnog aerodroma Sarajevo i koje je prostorno planskom dokumentacijom namijenjeno za razvoj ovog aerodroma. Uz prijedlog za utvrđivanje javnog interesa dostavljen je elaborat, čime su se ispunili uvjeti da se može pristupiti eksproprijaciji nekretnina.

Vijeće dalo saglasnost za provođenje postupka dodjele koncesije Termalnoj rivijeri

Općinskom vijeću Ilidža obratilo se zahtjevom Termalna rivijera “Ilidža” za davanje saglasnosti za provođenje postupka dodjele koncesije za eksploataciju vode iz dva bunara koji se nalaze na zemljištu Termalne rivijere Ilidža d.o.o Sarajevo.

Termalna rivijera se obraćala i Ministarstvu privrede Kantona Sarajevo. Iz odgovora Ministarstva se vidi da privredno društvo Termalna rivijera d.o.o nije zaključilo ugovor o koncesiji, a koristi vodu iz vlastitih vodozahvata i da je obavezno pokrenuti postupak propisan Zakonom o koncesijama za dodjelu i zaključiti ugovor o koncesiji.

Prema Zakonu o koncesijama, uz zahtjev za samoinicijativnu ponudu za dodjelu koncesije, dostavlja se studija opravdanosti i dodjele koncesije, i riješena predhodna pitanja, saglasnost Općinskog vijeća kao i dokumenti specifični za oblast koncesije. Općinsko vijeće je nadležno za izjašnjavanje o zahtjevu za davanje saglasnosti za dodjelu koncesije i ta saglasnost predhodi provođenju postupka dodjele koncesije.



Informacije

Na sjednici jedna od tačaka bila je i Informacija o uspjehu u učenju i vladanju učenika osnovnih i srednjih škola na području općine Ilidža u školskoj 2015/2016. godini koju je vijeće primilo k znanju. Nastavni program se odvijao u skladu sa zakonom, koji je u cijelosti realizovan. Vijeće je razmatralo i Informaciju o stanju i aktivnostima u oblasti rada sa mladima, sporta i kulture u 2016. godini. U informaciji je istaknuto da se kreiranje i razvoj omladinske politike Općine Ilidža temelji na Zakonu o mladima Federacije BiH, preporukama relevantnih evropskih dokumenata i Rezolucije o mladima u BiH, te da je Općina budžetom za 2016. godinu planirala posebnu budžetsku liniju namijenjenu mladima u iznosu od 152.000 KM.

Programom rada Općinskog vijeća predviđeno je razmatranje Informacije o ugroženosti teritorije općine Ilidža od neeksplozivnih ubojnih sredstava i minsko-

Program rada Općinskog vijeća Ilidža za 2017.

Program rada Općinskog vijeća za 2017. godinu bila je jedna od tačaka dnevnog reda druge sjednice Općinskog vijeća Ilidža.

Programom rada utvrđeni su zadaci Općinskog vijeća odnosno prijedlozi akata koje će vijeće razmatrati u 2017. godini, a koji proizilaze iz zakona, utvrđene politike, ekonomskog razvoja Općine kao i drugih pitanja iz samoupravnog djelokruga općine, nosioci pripreme materijala i rokovi za razmatranje.

eksplozivnih sredstava koju je Vijeće primilo k znanju. U informaciji je naglašeno da je Općina Ilidža u procesu deminiranja bila jedna od najuspješnijih općina u Bosni i Hercegovini i da će i u narednom periodu nastaviti ovaj proces kontinuirano i kvalitetno kako bi Ilidža bila sigurno mjesto za život.

Austrijski ambasador u BiH u posjeti Općini Ilidži

U radnoj posjeti Općini Ilidža 9. decembra bio je ambasador Republike Austrije u Bosni i Hercegovini Nj.E. Martin Pammer, a ugostio ga je načelnik ove općine prof. dr. Senaid Memić.

Tokom posjete načelnik i saradnici su ambasadora Pammera upoznali sa razvojem i planovima za dalji napredak ove lokalne zajednice. Razgovaralo se o investicijama, obrazovanju, kulturi, razvoju turizma i mogućnostima saradnje Ilidže i Austrije.

“Bitno je da Ilidža bude ljepša nego što je bila, da se trudimo napraviti je svjetskom destinacijom, a vodimo i brigu o stanovništvu i njihovim potrebama. Izbori su



pokazali da ljudi cijene to što mi radimo, a mi kažemo da možemo i moramo još bolje” rekao je, između ostalog, načelnik Memić.

Nj.E. Pammer istakao je zadovoljstvo prezentovanim sadržajima i nadu da će dobra saradnja biti u i budućnosti, jer Ilidža ima mnogo ostavštine Austro-ugarske koja se čuva.

Radna posjeta delegacije Vlade Kantona Sarajevo Općini Ilidža

Delegacija Vlade Kantona Sarajevo predvođena premijerom Elmedinom Konakovićem posjetila je 7. decembra Općinu Ilidža. Načelnik Općine prof. dr. Senaid Memić, sa saradnicima upoznao ih je sa realizovanim projektima u 2016. godini i planovima za 2017. godinu.

Delegaciji su prezentirani značajni investicioni projekti Općine: vodosnabdjevanje Rakovice, izgradnja brze

Budžet po mjeri građana

Općinsko vijeće Ilidža 8. decembra 2016. godine na prvooj redovnoj sjednici u Multifunkcionalnoj sali utvrdilo je Nacrt budžeta za 2017. godinu u iznosu 24 miliona KM. Utvrđen Nacrt upućen je na javnu raspravu u periodu od 9. do 14. decembra. U 16 MZ održane su javne rasprave na kojima su se građani izjašnjavali o prioritetima u svojim MZ.

Načelnik Općine Ilidža prof. dr. Senaid Memić i njegovi saradnici u svih 16 MZ čuli su prijedloge i mišljenja građana o budžetu za 2017. godinu, koji će zasigurno biti uvršteni u Budžet Općine Ilidža za 2017.



ceste prema Hrasnici, saobraćajnice od mosta Alije Izetbegovića do ratnog mosta, regulacije vodotoka Zujevine, Dobrinje Bosne, milionska ulaganja u obnovu škola. Upoznati su sa planovima općinske administracije u 2017. i to: pitanjima gradnje tramvaj pruge Ilidža-Hrasnice, nastavka radova na sistemu vodosnabdjevanja i kanalizacije u Rakovici, regulacije Zujevine, pitanjima uređenja centra Ilidže, gradnje Centra za zdravo starenje, Centra za djecu sa posebnim potrebama te o projektu Nova Ilidža.

Načelnik Memić iznio je i probleme u svom radu, a tiču se nenadležnosti općine i inicirao uključivanje Kantona i resornih ministarstva o pitanja vodozaštitne zone, međunarodnog aerodroma, Vrela Bosne, Stojčevca, koji se nalaze na teritoriji općine Ilidža i gdje je potrebno stanovništvu riješiti dugogodišnja pitanja. Premijer Konaković je izrazio želju za zajedničkim djelovanjem Kantona i Općine Ilidže.

“Svaki metar kantona je nama bitan i važno je da zajedno radimo i želimo da unaprijedimo saradnju. Riješit ćemo novim zakonima dobar dio problema na terenu. Nema dileme da mi želimo i podupiremo razvoj lokalnih zajednica snažno a to možemo samo zajedničkim dogovorima”, kazao je između ostalog premijer Konaković.

Dogovorena je intenzivnija saradnja i komunikacija između Vlade i Općine, a sve u cilju pronalazjenja najboljih rješenja za realizaciju planiranih projekta kojima se otvaraju nova radna mjesta i stvaraju bolji uslovi za život.



Uručeni ugovori o stipendiranju 320 učenika i studenata

Općinsko vijeće Ilidža na prijedlog Općinskog načelnika na prvoj redovnoj sjednici donijelo je Odluku o stipendiranju 320 talentovanih učenika i studenata u školskoj/akademskoj 2016/2017. godini u ukupnom iznosu

od 295.140 KM. Odlukom će se stipendirati 120 učenika srednjih škola i 200 studenata. Mjesečni iznos stipendije za učenike i studente prve godine je 78 KM, a za studente od druge do šeste godine kreće se u rasponu od 96 do 120 KM zavisno od postignutog rezultata u predhodnoj godini. Stipendije će se isplaćivati deset mjeseci. Sredstva dodijeljena stipendijom se ne vraćaju.

Načelnik Općine Ilidža prof. dr. Senaid Memić, 20 decembra 2016. godine u sali Općine Ilidža upriličio je prijem i podjelu ugovora o stipendiranju za talentovane učenike i studente. Ugovore je učenicima i studentima uručio Denis Muhović, pomoćnik načelnika za obrazovanje, kulturu, sport i informisanje.

„Stipendiranje talentovanih učenika i studenata je investiranje u našu budućnost i dodjela ugovora o stipendiranju mi je najdraža obaveza jer ste vi naš ponos. Vaša jedina obaveza je da nastavite da učite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić.

Otvoren novoizgrađeni most na vodotoku Trnava u MZ Blažuj

U Mjesnoj zajednici Blažuj, u naselju Vlakovo iza fabrike „Dallas“ završeni su radovi na izgradnji mosta sa uređenjem dijela korita vodotoka Trnava koji je svečano pušten u promet 26. decembra 2016. godine. Na mjesto starog drvenog, dotrajalog mosta preko kojeg je sa prvim kišama prelazak bio riskantan izgrađen je novi armirano-betonski most širine osam i raspona 8,4 metra. Urađena je i armirano-betonska regulacija korita uzvodno i nizvodno u dužini 56 metara, pročišćen vodotok u dužini od 100 metara i dovedena javna rasvjeta. Izvođač radova je bila firma IN d.o.o. Sarajevo, a vrijednost projekta je 117.915 KM koje je finansirala Općina Ilidža. Radovi su trajali 90 dana. U narednom periodu u planu je asfaltira-



nje pristupnog puta do mosta, a planirana je i izgradnja još dva mosta uzvodno.



Prijem za učenike, autore likovnih radova za kalendar Općine Ilidža

I ove kao i predhodnih godina Općina Ilidža je za štampanje kalendara za 2017. godinu kao likovno rješenje koristila najuspješnije likovne radove sa motivima Ilidže učenika osnovnih i srednjih škola sa područja općine.

Tim povodom, 28. decembra 2016. godine u Općini Ilidža upriličena je prezentacija općinskog kalendara za 2017. godinu i prijem za učenike osnovnih i srednjih škola, autore najljepših likovnih radova, kao i njihove nastavnike likovnog odgoja.

Načelnik Općine Ilidža prof. dr. Senaid Memić čestitao je učenicima čiji radovi se nalaze na kalendaru i njihovim nastavnicima, te im tom prilikom uručio diplome i prigodne novčane nagrade.

„Vi koji ste nagrađeni treba da se ponosite i sad i u budućnosti i svako treba da radi ono što voli. Zapamtite da samo rad donosi vrijednosti i u sve što ste uložili svoj trud jednog dana će vam se pozitivno vratiti. Nadam se da će vas ove skromne nagrade motivisati za dalji rad i trud koji je

ovom prilikom prepoznat. Želim vam puno sreće i uspjeha u životu“, kazao je u svom obraćanju učenicima načelnik Memić.

Nagrađeni učenici, autori likovnih radova su: Almedina Ahmetović (Četvrta OŠ), Hasan Hadžić (Srednja tehnička škola grafičkih tehnologija, dizajna i multimedije), Enis Ušto (Šesta OŠ), Džejla Salihović (Deseta OŠ), Džejla Fetahović (Sedma OŠ), Ahmed Memija (Druga OŠ), Tarik Bojčić (Treća OŠ), Amina Koso (Peta OŠ), Remza Oković (Prva OŠ), Meliha Čolpa (Deveta OŠ), Hana Sofović (Osma osnovna škola „Amer Čenanović“) i Adna Hrnjić-Musić (OŠ „El-Manar“).

Javna rasprava o Nacrtu Zakona o prostornom uređenju

Nacrt Zakona o prostornom uređenju Kantona Sarajevo bio je tema javne rasprave, koju su organizirali Općinski načelnik i Služba za prostorno uređenje, održane u Općini Ilidža 9. decembra.

Skupština Kantona Sarajevo donijela je zaključak kojim je utvrđen Nacrt Zakona o prostornom uređenju u KS i u skladu s tim predstavnici Ministarstva prostornog uređenja, građenja i zaštite okoliša prezentovali su u Općini Ilidža navedeni nacrt sa naglaskom na novine koje su utvrđene.

Javnoj raspravi prisustvovao je i resorni ministar Čedomir Lukić, koji je odgovarao na upite građana.

Sve primjedbe sugestije i mišljenja na Nacrt Zakona građani mogu dostaviti Službi za prostorno uređenje do 20. decembra 2016. godine, a Služba će proslijediti Vladi Kantona Sarajevo.



Timski za bolju Ilidžu

U Općini Ilidža 19. decembra održan je sastanak članova Kolegija Općinskog vijeća i pomoćnika Općinskog načelnika na kojem se razgovaralo o Programu rada Općinskog vijeća Ilidža za 2017. godinu.

Istaknuta je želja i namjera da rade timski, a sve u interesu što bolje saradnje i funkcionisanja na zadovoljstvo građana Ilidže.



Potpisan ugovor za sanaciju vrtića „Radost“ u Hrasnici

Načelnik Općine Ilidža prof. dr. Senaid Memić i direktorica JU „Djeca Sarajeva“ Jasmina Čongo, 28. decembra u Općini Ilidža potpisali su ugovor o sufinansiranju sanacije dijela objekta vrtića „Radost“ u Hrasnici. Sanacijom su obuhvaćeni građevinsko-zanatski radovi, radovi na vodovodnim, kanalizacionim, elektro i mašinskim instalacijama. Za realizaciju ovog projekta pomoći predškolskom obrazovanju, a po ovom ugovoru, Općina je iz budžeta za 2016. godinu odobrila sredstva u iznosu od 38.515 KM.

„Kada su u pitanju vrtići u našoj općini, nismo zadovoljniji. Obdanište u Hrasnici je zapušteno i ova sredstva su prilika da se dovede u funkcionalno stanje. Iako obdaništa nisu u našoj nadležnosti mi izdvajamo sredstva za njihovu adaptaciju. Za vrtić u Lužanima dali smo 100.000 KM za sanaciju, te finansirali izgradnju ograde oko vrtića. Mi ćemo i dalje pomagati vrtiće na našoj teritoriji i podržavati odgoj i rad sa djecom“, kazao je načelnik Memić.

Direktorica JU „Djeca Sarajeva“ Jasmina Čongo se ovom prilikom zahvalila načelniku i Općini Ilidža na pomoći i podršci koju daju ovim ustanovama, te istakla da su na području općine Ilidža u funkciji dva vrtića u naseljima Lužani i Hrasnica. Ova sredstva iskoristit će da se vrtić u Hrasnici u cijelosti stavi u funkciju, jer je do sada korišten samo jedan dio objekta, a time će se poboljšati uslovi djece koja u njemu borave.



Godišnjica pokušaja odbrane Otesa



Na platou MZ Otes, ispred spomen-obilježja, u organizaciji Udruženja boraca Zelene beretke i Općine Ilidža, 5. decembra 2016. godine položeno je cvijeće u znak sjećanja na šehide i poginule borce tog područja tokom agresije april-december 1992. godine. Prigodnim govorom se obratio Dino Džaferbegović, generalni sekretar

Udruženja boraca Zelene beretke i predsjedavajući Općinskog vijeća Ilidža Muhamed Omerović, koji su podsjetili prisutne na značaj ovog naselja i žrtava koje su pale za odbranu.

Ovo obilježavanje trebalo bi prerasti u tradicionalno, s jednim ciljem, da se nikad ne zaboravi i ne ponovi.

Na Ilidži registrovano 215.707 noćenja

Ilidža dugi niz godina prednjači u Kantonu Sarajevo po broju dolazaka i ostvarenih noćenja turista, a u samom vrhu je na nivou BiH. Za prvih deset mjeseci 2016. g. u Kantonu Sarajevu je registrovan dolazak 315.653 gostiju, koji su ostvarili 667.065 noćenja, od toga na Ilidži je registrovano 100.227 gostiju, koji su ostvarili 215.707 noćenja.

Na području općina Ilidža raspoloživa su 23 smještajna objekta (18 hotela, dva motela, po jedno prenočište, ženski studentski dom i hotelsko naselje sa auto kampom) sa ukupno 1.623 sobe i 3.510 kreveta, što čini 1/3 ukupnih smještajnih kapaciteta na Kantonu Sarajevo.

Niz građevinskih investicija na turističkim objektima koji su stavljeni u funkciju tokom 2016. g. su dodatno ojačale poziciju i ponudu Ilidže na turističkoj karti BiH i to: Izgradnja hotelskog naselja "Oaza" sa 12 stambenih vila, 60 apartmana sa 240 ležaja, restorana sa 200 sjedećih mjesta i 200 u bašči, u okviru Hotelsko banjско rekreativnog društva "Hoteli Ilidža" d.d., izgradnja hotela "Hills" sa 261 sobom i 813 kreveta, kongresnim salama spa centrom dječijom igraonom "Kinderland" na 3.000 m², u okviru "Mrkulić kompanij", izgradnja hotela "Malak Regency" sa 174 luksuzne sobe i 379 kreveta, dvije konferencijske sale, wellnes i spa centrom i dva restorana.

Otvaranjem Hotel Krone, renovirana je zgrada izgrađena početkom prošloga vijeka, davne 1907. godine, sa 26 smještajnih jedinica, od čega je 12 elegance i šest luxury soba, tri suita i pet apartmana što je također jedan od objekata koji je ojačao ponudu za turiste

Mada kalendarska godina još nije završena, po dostupnim informacijama iz nadležnih ustanova poboljšanje turističke ponude na Ilidži prati i porast posjetitelja u 2016. g. na dva lokaliteta koja se izdvajaju po aktivnosti i interesovanju turista.

Podsjećanja radi Vrelo Bosne je u 2015. g. posjetilo 190.000 turista (bez lokalnog stanovništva i djece do šest godina koji ne plaćaju ulaz), a Spomenički kompleks "TUNEL D-B" je zabilježio 120.000 posjeta.



Općina Ilidža ima jednu od najsavremenijih Arhiva



U suterenu zgrade Općine Ilidža smješten je arhivski depo. Arhiv je memorija općine. Od davnina u arhivi se čuva gradivo o svim pravima, dokazima, obavezama, postupcima u upravnom postupku. Dokumenti se odlažu onako kako i nastaju. U Arhivi Općine Ilidža, koja prema ocjenama stručnjaka, predstavlja jednu od najsavremenijih u Kantonu Sarajevo i šire, nalazi se arhivska građa u potpuno sređenom stanju, složena u pokretnim gondolama što omogućava brzo i efikasno pronalaženje predmeta. Ona nije nastala slučajno već predanim radom arhivarke Kenane Borančić.

“Posao arhivara nije dosadan vrlo je zanimljiv jer svaki predmet je jedinstven za sebe kao i građanin koji je predao zahtjev” kazala nam je Kenana Borančić.

U arhivskom depou su odloženi predmeti koji se čuvaju, od datuma rješavanja prema listi kategorija arhivske i registraturne građe, do predmeta koji su trajno operativni npr. Služba za katastar, Matični ured i predmeti

koji se čuvaju od 30-50 godina i isti se po isteku roka predaju Historijskom arhivu Grada Sarajeva.

Na naše pitanje šta najčešće građani traže iz arhive? Borančić nam je rekla da se najčešće izuzimaju predmeti iz Službe za prostorno uređenje tj. građevinske dozvole i predmeti imovinsko-pravnih pitanja.

“Kad se građanim obrati sa zahtjevom za uvid u predmet, ili kopirati neki akt iz predmeta nije ga teško pronaći jer je složen po klasifikacionoj oznaci, godini u kojoj je nastao i broju, te se može pronaći za najduže 15 minuta. Svake godine se vrši izlučivanje i uništavanje predmeta kojima je istekao rok čuvanja prema važećoj listi kategorija arhivske i registraturne građe. Sva građa koja je nastala u radu ovog organa mora biti evidentirana kroz arhivsku knjigu izraženu u arhivskim jedinicama (arhivske kutije, herbari, fascikle) i umanjena za onoliko koliko je uništeno tih jedinica. Na registraturnim jedinicama (kutijama, fasciklima, registratorima, knjigama, kartotekama i dr.), ispisuje se pun naziv stvaraoca građe, godina nastanka građe, vrsta građe, klasifikaciona oznaka i redni broj pod kojim je registraturna jedinica upisana u arhivsku knjigu i rok čuvanja iste.

Da bi arhiva besprijekorno funkcionisala jako je bitno da početak odnosno otvaranje predmeta za obradu, koje počinje zahtjevom stranke u pisarnici bude u skladu sa Uredbom o kancelarijskom poslovanju, što je pisarnici imperativ, istakla je Borančić.

Također, u cilju poboljšanja zaštite arhivske građe koja je smještena u posebnim prostorijama, uveden je stabilni sistem za gašenje požara “Aerosolom”.

Općina ima i Biblioteku službenih glasila

Općina Ilidža je formirala Biblioteku službenih glasila koja je završena još u julu 2016. godine i smjestila je u arhivski depo.

U ovom projektu učestvovala je Služba za finansije Općine ilidža i volonteri koji su raspoređeni u toj službi.

U Biblioteci službenih glasila smještene su službene novine izdate od 1990. do 2015. godine (Službeni glasnici BiH, Službene novine FBiH i Kantona Sarajevo).

Za rad i zalaganje u ovom projektu, načelnik Općine Ilidža prof.dr. Senaid Memić je vrijedne volontere, koji su radili u specifičnim uslovima, čiji je rezultat vidljiv, nagradio slobodnim danom.



Donesena Betlehemska svjetlost

Članovi Saveza odreda izviđača Kantona Sarajevo donijeli su Betlehemsku svjetlost u Župnu crkvu “Uznesenja Blažene Djevice Marije” na Stupu, kao i u Samostan časnih sestara “Karmelićanki”.

Tom prilikom pročitali su poruku mira svim građanima BiH, a ovogodišnja poruka mira je posvećena stanovništvu Sirije.



Učenici Grafičke škole predstavili načelniku projekat programiranja

“Svi mi živimo u vremenu u kojemu je obaveza biti informatički pismeni i to danas je prioritet, kazao je načelnik Općine Ilidža prof. dr. Senaid Memić 8. decembra

2016. godine na sastanku sa učenicima Srednje tehničke škole grafičkih tehnologija, dizajna i multimedije koji učestvuju u programu “Sat kodiranja”.

Povodom ovogodišnjeg “Sata kodiranja / programiranja” koji se realizuje u nekim osnovnim i srednjim škola Kantona Sarajevo, a u okviru Sedmice informatičke edukacije, učenike je primio načelnik Memić. Mladi talenti su mu predstavili projekat, a tiče se izrade plana kodiranja / programiranja.

“Sat kodiranja” najveći edukativno-informatički pokret, pokrenut prije nekoliko godina od američke neprofitne organizacije Code.org, namijenjen sticanju prvih programerskih iskustava. Cilj je približiti djeci i omladini moderne tehnologije i programiranje općenito, te ih na taj način

usmjeriti na zanimanja u IT-ju koja su danas deficitna na tržištu.

Bosna i Hercegovina je, na čelu sa SMART RC, a Centar za promociju civilnog društva već drugu godinu zaredom ostvaruje najbolje rezultate u regionu, sa preko 40.000 mladih ljudi uključenih u zadnje dvije godine.

Uručena oprema vatrogascima u iznosu 38.393 KM

Općina Ilidža nastavlja opremanje službi zaštite i spašavanja. Mira Boras, pomoćnik načelnika za civilnu zaštitu ispred zgrade Općine 12. decembra uručila je Službi zaštite i spašavanja formirane u Vatrogasnom društvu “Ilidža” najsavremeniju opremu koja će im poslužiti u radu. Oprema će se koristiti u slučaju saobraćajnih i drugih nesreća.

Vrijednost opreme je 38.393 KM. Asmir Imamović rukovodilac Službe zaštite i spašavanja od požara izrazio je zadovoljstvo dosadašnjom saradnjom sa Općinom i očekivanje da ona bude nastavljena i u narednom periodu. Zahvalio je općini na opremi koja će doprinijeti kvalitetnijem radu ove jedinice, naglašavajući želju da se oprema što manje koristi.



Nastavljeno opremanje Službe zaštite i spašavanja

Općina Ilidža nastavila je opremanje svojih službi zaštite i spašavanja. Predstavnica Općine Ilidža Mira Boras svečano je uručila 1. decembra 2016. godine alpinističku opremu u vrijednosti 33.376 KM, Službi zaštite i spašavanja sa visina i nepristupačnih terena, formirane u Gorskoj službu spašavanja Općine Ilidža. Nabavkom ove opreme u velikoj mjeri su zadovoljene potrebe Službe zaštite i spašavanja.



Galerija volonterizma – Volontiranje je cool

U organizaciji Centra za razvoj omladinskog aktivizma „CROA“, 5. decembra 2016. godine održana je „Galerija volonterizma“ – završna manifestacija projekta „Volontiranje je cool!“. Općina Ilidža prepoznala je vrijednost ovog projekta koji promovirše pozitivne efekte volonterizma i finansijski ga podržala.

Na manifestaciji je učestvovalo više od 250 volontera koji su predstavljali svoju volontersku grupu, a došli su iz 35 osnovnih škola sa područja Sarajeva, Mostara, Stoca, Konjica, Čapljine, Goražda, Trnova, Istočnog Sarajeva i Foče.

Više od 500 volontera je u proteklm mjesecima jednom sedmično realiziralo volonterske aktivnosti po vla-

stitom izboru s ciljem rješavanja problema lokalnih zajednica. Volontirajući u lokalnim zajednicama ukupno su ostvarili više od 50.000 volonterskih sati i doprinijeli našoj državi više od 150.000 KM.

Cilj manifestacije je omogućiti volonterima da prezentuju svoj volonterski rad i angažman, razmjene svoja iskustva koja su stekli učešćem u projektu „Volontiranje je cool!“, promovirše korisne efekte volonterizma i pozovu vršnjake na razmišljanje i uključivanje u volonterski rad.

Kroz projekt ‘Volontiranje je cool!’ zajedno sa školama, kao ključnim nositeljima odgoja i obrazovanja, pripremaju se učenici za suživot s drugima u zajednici te razvijaju i potiču kvalitetan sistem vrijednosti i odgovornosti za zajednicu.



Dodijeljena priznanja volonterima godine

U organizaciji Crvenog križa BiH, a povodom Međunarodnog dana volontera u Hotelu Hollywood 5. decembra 2016. održana je manifestacija „Volonter godine Crvenog križa“.

Cilj manifestacije je značaj isticanja volonterizma u međunarodnom pokretu za razvoj, povećanje svijesti o značaju doprinosa dobrovoljnog angažovanja i podsticanja što većeg broja ljudi da ponude svoje volonterske usluge.

Uručene su i zahvalnice svim volonterima koji su dali doprinos u 2016. godini.





Podijeljeno 19.200 sadnica maline

U sklopu realizacije projekta „Dodjela sadnica maline na općini Ilidža” Općina Ilidža je i ove kao i predhodne godina provela akciju podijelu sadnica maline zainteresovanim građanima koji imaju prebivalište i posjeduju poljoprivredno zemljište na području općine Ilidža. Sadnice je na prijedlog Stručne komisije dobilo 15 poljoprivrednika koji su se prijavili na raspisani javni poziv, a ukupno je podijeljeno 19.200 sadnica. Prednost za dodjelu sadnica imala su domaćinstva koja predhodnih godina nisu bila obuhvaćena podjelom sadnica i plastenika. Ovo je još jedna od akcija u nizu kojim Općina Ilidža pomaže stanovnicima u razvoju poljoprivrede. Za nabavku sadnica Općina je izdvojila 12.355 KM. Sadnice su dobili: Ćebirić Avdija iz Rakovice, ul. Česma br. 43, Cucak Nazif iz Butmira, ul. Butmirska cesta 194, Suljić Huso iz Rakovice, ul. Zenik br. 94, Glođo Namik iz Ilidže, ul. Josipa Slavenskog br. 5, Šalaka Kasim iz Sokolović-kolonije, ul. Bajre Kaljanca br. 38, Drnda Džemal iz Hrasnice, ul. Uzunovića sokak br. 10, Suljić Muharem iz Rakovice, ul. Zenik br. 120, Mujkić Almir iz Butmira, ul. Butmirskog bataljona br. 4, Sokolović Mirsad iz Lužana, ul. Karima Zaimovića br. 8, Uzunović Esmara iz Rakovice, ul. Kobiljača do br. 58, Ibišević Fikret iz Osjeka, ul. Osječki put br. 4, Salihović Elmir iz Gornjeg Kotorca, ul. Starine Novaka do br. 131, Opanković Muriz iz Rakovice, ul. Česma br. 15, Haznadar Alija iz Hrasnice, ul. Jasen br. 43 i Tinjak Šemso iz Rakovice, ul. Kakrinjski put do br. 434.

Korisna predavanja iz oblasti voćarstva

Udruženje poljoprivrednika Kantona Sarajevo u Multi-medijalnoj sali Ilidža organizovalo je predavanje iz oblasti voćarstva. Predavač je bio Boško Gaćeša, stručnjak iz ove oblasti.

Edukaciji je prisustvovalo 30-tak poljoprivrednih proizvođača sa područja općine. Općina Ilidža finansijski je podržala ovaj projekat.



Zavod za zapošljavanje koristi besplatno salu MZ Centar

Općina Ilidža besplatno je ustupila na korištenje svoje prostorije Zavodu za zapošljavanje FBiH.

Sala MZ Centar u ulici Abdulaha ef. Kantamirije 2A od 21. decembra trenutno se koristi za potrebe Biroa za zapošljavanje. Prostorije Zavoda za zapošljavanje se renoviraju te će se usluge pružati u MZ Centar do okončanja radova.



Osma osnovna škola “Amer Ćenanović” proslavila svoj dan

Osma osnovna škola “Amer Ćenanović” 22. decembra proslavila je Dan škole. Ova škola uvijek je znala pružiti topli ugođaj kojeg ni ovaj put nije nedostajalo.

Učenici škole su prigodnim programom gostima, roditeljima, nastavnicima i ostalim učenicima predstavili sve ono što tokom školske godine rade kroz različite izvannastavne aktivnosti.

Pruredili su ugodne trenutke i za oči i za uši kako to samo djeca znaju. Direktor škole Vahid Čustović u svom govoru osvrnuo se na značajne uspjehe koje postižu učenici ove škole i izrazio zahvalnost Općini Ilidža za dodjelu sredstva koje će biti utrošene za obnovu fiskulturne sale.



Škola na život ostavlja neizbrisiv trag...

“JU „Druga osnovna škola“ ovih dana niže uspješne perle na svoju raskošnu ogrlicu na koju je iznimno ponosna. Ogrlica je sačinjena od uspjeha, nizanih jedan za drugim, doprinoseći prepoznatljivosti, ali i nadograđujući sve segmente, nadopunjujući enterijer i eksterijer, slobodno možemo reći do neprepoznatljivosti. Naša škola živi svoju bajku, užurbanim koracima korača stazama uspjeha, ponosna što je u prilici pokazati da ispunjava data obećanja. Tople đачke učionice opremljene savremenom tehnologijom, od ranih jutarnjih sati upotpunjuju se novim namještajem i nastavnim učilima” kazala nam je Arnela Trešnjo, direktorica Druge osnovne škole koja se željela zahvaliti Općini Ilidža i načelniku prof. dr. Senaidu Memiću na izdvojenim sredstvima od 40.000 KM koje su utrošili za ove namjene.

“Namještaj unosimo u školu s iskrenom namjerom da uredimo sredinu u kojoj će djeca moći zadovoljiti svoje potrebe, znatiželju, kreativnost, maštu.... Zaista po ko zna koji put pokazujemo da je škola mjesto gdje djeca postaju ljudi, a ljudi postaju djeca, pa radoznom oku euforija koja vlada u školskom dvorištu ne bi bila jasna, jer pomišljate da su tu djeca, čuje se smijeh, vedrina, šale kakvu mogu stvoriti samo dječica, a ne odrasli ljudi.

Škola mora imati dušu, a mi smo sigurni da smo taj uvjet ispunili, posvetili smo se modernizaciji, opremanju i nadogradnji. Unaprijed se radujemo susretu sa djecom u ovako opremljenim učionicama i kabinetima, iščekujući njihovu reakciju, iskrice u očima i divljenje, jer bez lažne skromnosti svi imamo razloga za takve reakcije”, dodaje Trešnjo, te izražava zahvalnost i Službi za obrazovanje i informisanje, za saradnju, podršku, motivaciju, za prisutnost i pomoć u njihovim projektima.

Sigurni smo da škola ostavlja neizbrisiv trag na život pojedinca baš kao što to čini i ljubav, a škola je prije svega to – uzajamna ljubav koja čuda stvara.



Podijeljeni paketići za 91 dijete

Općina Ilidža i ove godine 28. decembra 2016. godine u prostorijama Multimedijalnog centra organizovala je podjelu novogodišnjih paketića za djecu uposlenika organa uprave, volontera i uposlenika boračkih udruženja sa područja ove općine. Podijeljeno je ukupno 91 paketić sa slatkišima i igračkama. Paketiće je djeci uručio Djeda mraz uz novogodišnju jelku i zabavu, koju je organizovala Spajalica.



Podijeljeni paketići za djecu RVI-ja

Udruženje RVI Ilidža 23. decembra 2016. godine upriličilo je podjelu novogodišnjih paketića za djecu ratnih vojnih invalida do 10 godina starosti. Kao i proteklih godina Udruženje je uspjelo obezbjediti sredstva za nabavku 110 paketića kako bi obradovalo mališane, a samim tim i roditelje koji su dali svoje zdravlje braneći našu državu.

Udruženje Zlatna ruka obradovalo djecu

Udruženje Zlatna ruka, 24. decembra 2016. godine organizovalo je podjelu 57 paketića djeci bez roditelja i djeci sa posebnim potrebama, a u povodu Božića i Nove godine. Paketi su obezbjeđeni uz nesebičnu pomoć Braće Mujić, Maria Mališića, Faika i Mire Višić, Medine Dedić, Subhije Alijagić i Medihe Al Momani, te im se ovom prilikom vrijedne članice ovog udruženja srdačno zahvaljuju na pomoći koju im pružaju u njihovim humanim akcijama.



Samra Ibrahimović pobjednica “Na mlađima svijet ostaje”

U organizaciji Udruženja za očuvanje tradicije i razvoj kulturno-umjetničkog stvaralaštva “BAŠLIJA” 17. decembra realizovan je Muzički festival djeca pjevaju hitove „Na mlađima svijet ostaje“.

I upravo tako, da na mlađima svijet ostaje, ali i svijetla muzička budućnost, potvrđuje ovogodišnji finalni krug pomenutog takmičenja. Ilidžanski osnovci, njih 10 su nas počastili izvedbama različitih žanrova muzike i priredili nam noć za pamćenje. Najuspješnija je bila Samra Ibrahimović koja je osvojila prvo mjesto i mogućnost da snimi pobjedničku pjesmu, drugo mjesto pripalo je Tariku Avdoviću, a trećeplasirana je Suana Ahmatović i svi oni su učenici JU „Deseta osnovna škola“.

Nagradu za najbolji scenski nastup dobila je Ema Durić iz Sedme osnovne škole. Plakete i diplome koje su dobili, zasigurno će krasiti njihove vitrine, a iskustvo sa festivala bit će smjernica od pomoći u njihovom budućem životu i radu. Vođa projekta Džemo Hurić još jednom je zahvalio Općini Ilidža odnosno načelniku prof.



dr. Senaidu Memiću i Službi za obrazovanje, kulturu, sport i informisanje na pomoći u realizaciji ovog projekta.

Prijem za najbolje sportiste u 2016. godini

Načelnik Općine Ilidža prof. dr. Senaid Memić upriličio je 6. decembra 2016. godine u kabinetu prijem za sportiste sa područja općine Ilidža koji su ostvarili značajne rezultate na takmičenjima u 2016. godini. Načelnik Memić je tom prilikom uručio i novčane nagrade.

“Čestitam vam na uspjehu, želim i ubuduće da donosite medalje, da budete prvaci u svemu što radite. Ponosan sam na vas, vaše rezultate i vi ste najbolji ambasadori naše općine. I u narednom periodu nadam se da ćete znati samo za pobjede i vrhunske rezultate i biti i dalje ponos naše općine”, izjavio je, između ostalog, načelnik Općine Ilidža prof. dr. Senaid Memić.

Nagrađeni su: Džemal Bošnjak, član Bokserskog kluba “Ilidža” koji je ostvario plasman u treće kolo kvalifikacija za Olimpijske igre, prvak BiH i Adem Fetahović, također član Bokserskog kluba “Ilidža” prvak BiH za 2016. godinu, koji je imao plasman u treće kolo na kvalifikacijama za Olimpijske igre.

Vrhunski rezultat imao je i Meris Muhović, član Karate kluba “Champion” zlatna medalja na Svjetskom kupu u Sloveniji, prvak BiH, Edin Sinanović, član Kick boxing akademije “Ilidža” zlatna medalja na Evropskom kupu u Hrvatskoj, prvak BiH za 2016. godinu, proglašen za najboljeg borca na Prvenstvu BiH, Mirza Pramenković, član Kick boxing “Zlatni borci” svjetski prvak za juniore u Irskoj, prvak BiH.

Nagrađeni su i sportisti iz Karate kluba “Champion” i to Haris Suljković, četvrto mjesto na Svjetskom prvenstvu u Austriji, prvak BiH, Anes Čongo, bronzana medalja na Svjetskom kupu u Sloveniji, Eldin Hajdarpašić, bronzana medalja na Evropskom prvenstvu za kadete u Kipru i Alma Subašić, zlatna medalja na Balkanskom prvenstvu u Beogradu. Novčano je nagrađena i Minela Selman, član Kick boxing akademije “Ilidža” dobitnica srebrne medalje na Evropskom kupu u Hrvatskoj.

Domaćini prijema pored načelnika Memića, bili su i Nermin Bašović, stručni saradnik za sport, Denis Muhović, pomoćnik načelnika za obrazovanje, kulturu, sport i informisanje i Muhamed Omerović, predsjedavajući Općinskog vijeća Ilidža.



Juniorški reprezentativci družili se sa djecom iz KK Ilidža



Košarkaški klub Ilidža koji se nedavno reaktivirao, bazirao je svoj rad sa najmlađim uzrastom, ispratio je 2016. godinu druženjem djece i njihovih roditelja u Osnovnoj školi u Rakovici.

Uz takmičenje, prigodne nagrade i poklone za mlade igrače, svi su se izvrsno zabavljali. Najviše oduševljenja izazvao je dolazak juniorskih reprezentativaca BiH, zlatnih kadeta sa evropskog prvenstva 2015., Njegoša Sikiraša i Sani Čampare koji su se odazvali pozivu na druženje sa mališanima iz KK Ilidže.

Košarkaški klub Ilidža je 18. decembra 2016. bila domaćin Sedmog kola Minibasket lige Košarkaškog saveza Kantona Sarajevo u Devetoj osnovnoj školi u Rakovici. Odigrane su četiri zvanične utakmice u okviru lige te jedna revijalna utakmica mladih košarkašica KK Ilidža, koja je bila pravi spektakl dobrog raspoloženja. Treneri svih gostujućih timova: Hadžimulić Semir, Delić Dino, Babić Adis, Mujan Damir, Kurspahić Amar, Bjelošević Amar, Bučuk Enes, Ademović Adnan, Beganović Adis i Begić Armin, birali su najtalentovanije dječake tako da da je ovom prilikom proglašena idealna petorka kola kao i MVP kola.

Idealna petorka kola su: Kalmar Dan (KK Gen), Vukadin Vuk (OKK Spars), Radivojević Andrej (KK Koš), Fejzić Alem (KK Bošnjak), Buljubašić Mirza (KK Ilidža) i Lojo Leni (KK Play off), a MVP kola je Fejzić Alem (KK Bošnjak).